

**Mesaz Chairman NCSRF pou lansman Monitoring Report 2017-2018 ek deziem Call for Proposals le 19 Zilet, 14.00 dan Sir Harilall Vaghjee Hall, Porlwi**

Bonzour e mersi pou zot prezans

National CSR Foundation enn institision bien zenn. An zilet lane dernier, nou ti pe fer nou bann premie deboursman lor baz nou National CSR Guidelines 2017. Depi sa, avek zot koudme, nou finn bien avanse.

Mo anvi, dabor, dir **mersi** tou bann partener ki finn kolabore dan travay ki nou finn fer e ki nou pe kontinie fer ansam. Mo anvi ek bizin dir mersi Premie Minis, bann differan Minister, bann mamb lor nou Council, Sekter Prive, sosiete sivil, bann universiter, tou bann NGO ki travay avek nou ek tou nou bann benefisier.

Mo bizin sirtou dir enn gran mersi Sekreter Zeneral ek Staff National CSR Foundation pou zot devouman. Premie staff ti pran travay le 1 Out 2017. Lezot inn rantre apre. Nou tou finn travay ansam pou ki nou instal enn institision solid, independan, efikas ek transparan. Nou finn bien travay, ansam avek nou bann partener, pou finaliz enn plan stratezik ki permet nou “promote” **developman ek drwa imin**.

Zordi, nou ankor dan nou premie “cycle” de finansman. Nou pe lans nou premie **Monitoring Report 2017-2018**. Zot pou gagn lokazion lir-li. Angro li dir ki boukou lorganizasion pe fer enn zoli travay me ena detrwa lorganizasion pou bizin enn koudme. Mo finn dir ki nou dakor pou ede me nou pa pou fer konpromi lor riger administrative ek financier, lor transparans, lor “good governance” ek lor letik profesyonel.

Enn Monitoring Report permet nou swiv progre bann proze. Ena bien bon, ena bizin mentoring ek capacity building. Seki pli inportan seki nou finn aprann travay ansam pou nou amelior nou lefikasite dan nou kolaborasion. Ver Desam 2018, nou pou piblie nou Evaluation Report 2018 lor rezilta nou bann proze.

Nou finn osi fer boukou konsiltasion avek bann Minister, sekter prive ek NGO. Dan kad preparasion bidze, nou finn prezant nou travay. Non-selman nou finn gagn felisitation me nou pe gagn plis responsabilite. Nou pe finn enn **“Central public funding agency for NGOs working with the poor and the vulnerable”**. Nou akeyir sa responsabilite-la avek boukou imilite ek nou kont lor kolaborasion tou nou bann partener pou ki nou kapav reflesi enn Action Plan performan pou nou ran lapel.

Zordi, nou pe osi lans nou deziem “cycle” de finansman lor baz enn “new funding framework”. Dokiman apel **“Policy and Guidelines on Funding”**. Se enn dokiman ki finn fer apre konsiltasion avek tou nou bann partener. Se enn dokiman ki explik nou filozofi, nou lapros ek nou model finansman. Nou pe distribie “hardcopies” zordi. Ena osi kopi lor nou sit

web. Mo pou invit tou nou bann partner lir-li. Nou pou gagn lokazion koz lor bann diferan pwin pandan nou bann “informasion Sessions”. Sa framework-la permet nou fer trwa zafer:

1. Etablir enn “partenariat” solid avek tou bann NGO
2. Investir dan bann nouvo proze inovater
3. Fer bann intervansyon pli holistic dan enn lapros Kominoter.

Li instal osi bann fondman lor lekel nou intervansyon pou baze. Nou pou bizin “Accountable” a tou moman pou sakenn nou bann aksion. Nou pou regilierman piblie bann dokiman. Apart nou Monitoring Report ek nou Evaluation Report, nou pou ena enn Annual Report. Nou pou ena osi boukou linformasion lor nou website ek nou invit nou bann partener rest an kontak permanan avek nou.

Deziem mo inportan, se transparans. Si zot lir nou bann dokiman, nou pe donn tou linformasion posib ek imaginab. Parfwa, malerezman, ena dimounn trouv voler ek pasdrwa partou. Apre 50 an nou lindependans, nou bizin kapav adopte tou bann kondision “good governance”. Nou pe travay avek ICAC pou finaliz enn Code of Conduct.

Eski nou lor bon direksyon? Mwa, ek mo staff, nou pe fer nou best ek nou “de bonne foie”. Me nou pou bizin evalie regilierman. Nou bizin kapav trouv enn linpakt. Si li pa kantitatif toudeswit, li bizin omwin dan kalite lavi. Si pena ditou rezilta, nou pou bizin re-reflesi. Nou bi ultim reste tir dimounn dan lamizer ek amelior kalite lavi dan nou sosiete.

Mo pou redir: Nou enn institision bien zenn kom. Nou pe install bann striktir. Nou rest a lekout nou bann partener. Nou pou al li dousman me sirman. Nou ena enn plan stratezik. Nou pou bouze dan enn manier metodik ek sistematik.

Parfwa, nou realize ki detrwa lorganizasion bizin sipor. Nou dakor pou ede, pou informe, pou explike. Nou pe osi panse pou donn enn koudme, ansam avek bann lezot partener, pou fer Capacity Building si ek kan bizin.

Ena enn deplian ki nou finn sirkile. Mo krwar, se premie dokiman ki zot bizin pran letan lir. Zot pou trouv enn kalandrie pou bann informasion sessions ki nou pe organize a partir la semenn prosenn. Nou pe fer sa par “Priority Areas”. Nou pou fer sa dan Garden Tower dan enn premie tan. Bann plas par sesion limite pou nou kapav koze, kominike ek dialogue. Nou invit sak lorganizasion anreziste zot. Ena bann lezot detail lor deplian-la.

Avan mo fini, mo bizin redir mersi pou zot prezans, pou zot kolaborasion, pou travay ki zot pe fer lor terin ek mo sir ki, ansam, nou ena kapasite pou fer la sosiete progresse dan Repiblik Moris.

Chairman, National CSR Foundation  
19 zilet 2018